

The logo consists of the words "NAŠA STRANKA" in white, bold, uppercase letters on a red rectangular background.

Politička organizacija građana „Naša stranka“
Općinski odbor Velika Kladuša
Adresa: Sulejmana Topića bb, Velika Kladuša
Telefon: 060 311 66 74
E-mail: info@kladusajenasa.org

Bosna i Hercegovina
Federacija Bosne i Hercegovine
Unsko-sanski kanton
Općina Velika Kladuša
Općinsko vijeće Velika Kladuša
n/r predsjedavajući i sekretar

PREDMET: VIJEĆNIČKA INICIJATIVA

Poštovani_e,

Na osnovu člana 7. Poslovnika Općinskog vijeća Općine Velika Kladuša kojim se propisuje pravo vijećnika da podnosi inicijative, koje se odnose na rad Općinskog načelnika i službi za upravu u izvršavanju zakona, drugih propisa i općih akata Općinskog vijeća, kao i na rad institucija koje imaju javna ovlaštenja, upućujem vijećničku inicijativu za **donošenje prijedloga Zaključka kojim se traži od Sekretara vijeća i Općinskog pravobranioca da do sljedeće sjednice vijeća daju stručno mišljenje o sukobu interesa u kojem se potencijalno nalazi vijećnik Amir Đogić, te formuliraju smjernice za dalje postupanje vijeća ukoliko ocijene da sukob interesa u ovom slučaju postoji.**

O B R A Z L O Ž E N J E:

Vijećnik Laburističke stranke Amir Đogić ujedno je i direktor JKUP Komunalije. Zakon o sukobu interesa u institucijama vlasti F BiH u članu 3. definiše da se "izabranim dužnosnicima" smatraju, između ostalih, i vijećnici u gradskim i općinskim vijećima; a član 4. istog zakona jasno kaže da je „članstvo u upravnom odboru, nadzornom odboru, skupštini, upravi ili menadžmentu ili u svojstvu ovlaštenog lica u javnom preduzeću nespojivo je sa javnim funkcijama izabranog dužnosnika, nosioca izvršne funkcije ili savjetnika.“

Statutom Općine, član 29, stav 3, propisano je da je općinski vijećnik dužan podnijeti ostavku na svaku od nespojivih funkcija u skladu sa posebnim zakonom, prije preuzimanja mandata vijećnika, a stav 4 precizira da Općinsko vijeće pokreće postupak za utvrđivanje prestanka mandata zbog sukoba interesa općinskom vijećniku koji za vrijeme trajanja mandata prihvati obavljanje dužnosti koja se prema odredbama posebnog zakona smatra nespojivom ukoliko isti prije preuzimanja funkcije koja se smatra nespojivom nije podnio ostavku na dužnost vijećnika.

Ove odredbe Zakona i Statuta nas obavezuju da kao vijeće tretiramo ovu problematiku i zauzmemo stav o potencijalnom sukobu interesa, te pokrenemo postupak za utvrđivanje prestanka mandata ukoliko sukob interesa postoji, te stoga podnosim inicijativu za donošenje Zaključka kojim se traži od Sekretara vijeća i Općinskog pravobranioca da do sljedeće sjednice vijeća daju stručno mišljenje o sukobu interesa u kojem se potencijalno nalazi vijećnik Amir Đogić, te formuliraju smjernice za dalje postupanje vijeća ukoliko ocijene da sukob interesa u ovom slučaju postoji.

Ime i prezime: Amir Purić
Klub vijećnika_ca Naše stranke

Velika Kladuša, 04.03.2021.